

✓ Մանկական ճվիկ

Ծիւ, ծիւ, ծիւծիւա,  
Ելեք, տեսեք՝ ո՞վ կուգա,  
Պստի պապը տուն կուգա,  
Չամիչ ուտելեն կուգա,  
Ճանճը տոգալեն կուգա,  
Ճնճուղը թը՛ռնելեն կուգա:

✓ Մամի, մամի

Երեխաները բռնում են միայնաց ձեռքից և ուղիղ գծով կանգնում:  
Շարքի վերջում կանգնածներից մեկը մյուսին հարցնում է.

- Մամի, մամի, խաղողը հասե՞լ է:

Մյուսը պատասխանում է.

- Հասել է, հասմըսել է,

Շանը կտամ, գելին կտամ,

Քեզ մի ճուր չեմ տա:

- Ինչո՞վ գամ՝ որ տաս:

- Դեղ - գուռնով:

Հարցնողն իր խմբով, դեղի և գուռնայի ձայներին նմանեցնելով, որևէ երաժշտություն «նվագելով», շարքի առջևից գալիս և անցնում է պատասխանողի և նրա կողքին կանգնածի թևերի տակով: Երբ շարքը նորից շարվում է իր նախկին դիրքով, պատասխանողի կողքին կանգնածի դիրքը փոխվում է: Նրա ձեռքերը խաչված են, իսկ ինքը՝ շրջված հակառակ կողմ:

Երկխոսությունը կրկնվում է մի քանի անգամ: Յուրաքանչյուր երկխոսության վերջում հանձնարարությունը տարբեր է լինում՝

ձիով, մեքենայով, թռչկոտելով, մի ոտքով թռնելով, ավանակով, հաց ուտելով (հա՛մ, հա՛մ, հա՛մ, հա՛մ,) երգելով, գնացքով, զմփիկով, նապաստակի նման ցատկելով և այլն: Ամեն անգամ անցնում են արդեն շրջվածի և կողքին կանգնածի բռնած ձեռքերի տակով: Երբ անցնում են վերջին զույգի թևերի տակով, պատասխանողն ասում է.

- Մամին կասի՝ սխտոր ծեծեք:

Շարքը, բաց չթողնելով ձեռքերը, ուրիշ թռիչքներ է կատարում՝ բացականչելով.

- Չը՛խկ, չը՛խկ, չը՛խկ, չը՛խկ:

- Մամին կասի՝ լվացք ենք արել, պարանը կարճ է:

- Քաշենք՝ երկարի:

Երկու կողմից խաղավարները, որոնց կողմից է շարքի կեսը, նրանց հետ քաշում են այնքան, մինչև մեջտեղի կամ որևէ զույգի ձեռքեր իրարից բաժանվեն: